

01 JUL 2002

Umno-sejarah

UMNO PEGANG TRADISI PERALIHAN KEPIMPINAN, KATA PAKAR SEJARAH

KUALA LUMPUR, 1 Julai (Bernama) -- Langkah Datuk Seri Dr Mahathir Mohamad menamakan Datuk Seri Abdullah Ahmad Badawi sebagai penggantinya mencerminkan kesinambungan peralihan kuasa secara tertib dan teratur yang dipegang oleh Umno, kata seorang ahli sejarah tanah air.

Prof Datuk Dr Ramlah Adam dari Universiti Malaya, berkata pengakuan parti-parti komponen Barisan Nasional kepada kepemimpinan Abdullah sebagai pengganti Dr Mahathir merupakan pengikirafan kepada perjalanan politik Umno.

"Saya rasa dalam sejarah, penggantian Presiden Umno dan Perdana Menteri berlaku secara semula jadi, sesuatu yang berlaku dengan kehendak Allah dan juga sesuatu yang ada kesinambungan," katanya kepada Bernama.

Beliau memberikan contoh peralihan kepemimpinan Umno yang berlaku secara aman daripada Datuk Onn Jaafar kepada Tunku Abdul Rahman, yang kemudiannya menjadi Perdana Menteri pertama, serta kemudiannya daripada Tun Abdul Razak Hussein kepada Tun Hussein Onn.

Ramlah berkata kesinambungan itu diteruskan oleh Hussein apabila beliau menamakan Dr Mahathir sebagai penggantinya sebelum mengundur diri daripada memimpin parti dan negara.

"Bila Dr Mahathir membuat perkara yang sama kepada Pak Lah, maka saya rasa perkara ini adalah suatu tradisi yang jelas kesinambungannya dan diterima pakai oleh semua pihak dalam Umno," katanya.

Dr Mahathir, yang dijadual kembali daripada percutian selama seminggu Rabu ini, membuat pengumuman mengejut mengenai perletakan jawatannya di akhir Perhimpunan Agung Umno pada 22 Jun lepas.

Beliau kemudiannya menamakan Abdullah sebagai penggantinya untuk mengambil alih teraju parti dan negara apabila beliau mengundur diri Oktober tahun depan.

Ramlah berkata anggota-anggota Umno yang biasa dengan tradisi peralihan kuasa secara tertib dan teratur itu, tidak mempunyai masalah untuk menerima Abdullah sebagai presiden parti.

"Apa yang mereka patut lakukan ialah berdiri sepenuhnya di belakang Pak Lah sebagai bakal Presiden Umno dan juga Perdana Menteri," katanya.

"Kewibawaan Pak Lah tidak boleh dipersoalkan kerana integritinya sebagai seorang ahli Umno cukup kukuh," katanya.

Ramlah pernah menulis mengenai Abdullah, antara tokoh lulusan Universiti Malaya, untuk dimuatkan dalam buku sempena 50 tahun universiti itu pada tahun 1999.

Menurutnya, Abdullah, yang menyertai Umno sejak berumur 18 tahun, tidak pernah meninggalkan parti itu.

"Ayah dan datuk beliau adalah tokoh-tokoh Umno yang cukup komited kepada Umno sehingga ke akhir hayat mereka. Dengan latar belakangnya yang kukuh, saya rasa orang Umno tidak ada masalah untuk menghormati dan mengetahui siapa Pak Lah sebenarnya," katanya.

Abdullah juga mempunyai pengalaman luas sebagai pegawai tadbir kerajaan sebelumpun beliau menceburi politik.

"Beliau adalah bekas penolong setiausaha Mageran (Majlis Gerakan Negara) yang merangka Dasar Ekonomi Baru di bawah (Allahyarham) Tun Razak, maka saya rasa komitmen beliau kepada orang Melayu dan negara adalah kental," katanya.

Katanya, tempoh peralihan kuasa sehingga Oktober tahun depan itu akan menentukan segala perancangan dapat berjalan baik.

"Ini membolehkan perkara-perkara yang mungkin separuh jalan dibuat oleh Perdana Menteri dapat diteruskan atau mungkin ada perkara baru yang dicadangkan seperti pengajaran bahasa Inggeris dalam mata pelajaran sains dan matematik boleh dibuat tindakan susulan," katanya.

-- BERNAMA

AZZ MAI